



Sesida dals

Communitgà ils

Protocol nr.

10 da favrer 2025

11 da favrer 2025

86/2025

### **Dumonda Hohl**

concernent l'augment da las entradas fiscalas dal chantun e da las vischnancas

### **Resposta da la Regenza**

Ils ultims 20 onns (2003 fin 2023) èn la situaziun finanziaria ed ils retgavs fiscals dal chantun e da las vischnancas sa sviluppads en moda plaschaivla. Uschia èsi stà pussaivel che la facultad dal chantun e da bleras vischnancas è vegnida rinforzada. A medem temp han pudì vegnir concluidas pliras reducziuns da taglia. Da l'autra vart èn er las incumbensas e las expensas creschidas fermamain, quai tar ina quota statala ch'è restada detg stabila.

Sin plaun chantunal han ils retgavs fiscals mussà dapi l'onn 2003 en total in svilup pli u main analog a la creschientscha dal product interior brut dal chantun (PIB; +49,7 %). Ils retgavs fiscals, inclusiv las taglias sin ils vehichels a motor, èn creschids per 46,2 %, e senza questas taglias – ch'èn liadas al quint da las vias – per 53,1 %. Sa svilupadas surproporzionalmain èn las taglias sin la facultad da las personas natirals (+120,1 %), las taglias a la funtauna (+92,5 %) e cunzunt las taglias sin il gudogn tras la vendita da bains immobigliars (+441,2 %). In augment sut la media hai dà tar las taglias sin las entradas da las personas natirals (+39,8 %) sco er tar las taglias sin il gudogn e sin il chapital da las personas giuridicas (+24,5 %). Ina stagnaziun hai dà tar las taglias sin ils vehichels a motor (-1,7 %) ed ina ferma reducziun tar las taglias sin l'ierta e sin donaziuns (-58,4 %).

Sin plaun communal èn las taglias sin las entradas e sin la facultad da las personas natirals, las taglias a la funtauna, las taglias sin il gudogn e sin il chapital da las personas giuridicas sco er las taglias sin il gudogn tras la vendita da bains immobigliars sa svilupadas en total pli u main tuttina sco sin plaun chantunal. Las vischnancas han profità fitg dal svilup da las taglias sin immobigliars da las personas natirals e giuridicas (stgars +150 %), che vegnan incassadas mo sin plaun communal, e da las taglias sin midada da maun.

*Tar la dumonda 1:* L'augment tar las entradas fiscalas totalas dal chantun e da las vischnancas dals ultims 20 onns (2003 fin 2023) pon ins attribuir en general a la creschientscha dal PIB. Il dumber da las personas occupadas è creschì per 20 % e la chareschia ha importà 11 %. Contribuì decisivamain al ferm augment han las

taglias sin la facultad da las personas natiralas (+120 %) e las taglias sin il gudogn tras la vendita da bains immobigliars (+441 %). Tuttas duas funtaunas d'entradas dependan fermamain dal svilup da las valurs en il sector d'immobiglias. Tar las taglias sin la facultad ha er il bun svilup dal sector da vaglias a la bursa gi in effect positiv. Er da menziunar èsi, ch'i vegn retratg adina dapli chapital dal provediment professional e lià (pitgas 2 e 3a) cun l'entrada en la vegliadetgna da pensiunament. Suenter la retratga furma quest chapital medemamain facultad imponibla. L'onn da retratga vegn questa facultad suttamessa in'unica giada ad ina tariffa da taglia speziala privilegiada. Ch'ils retgavs da las vischnancas èn s'augmentads pli fitg che quels dal chantun è d'attribuir en emprima lingia al svilup da las taglias sin immobiglias e da las taglias sin midada da maun.

*Tar la dumonda 2:* L'augment da 218 % tar il substrat fiscal da las facultads, che vegn menziunà en la dumonda, vegn eruì da l'Administraziun federala da finanzas sco valor potenziala per la gulivaziun da las resursas. Persuenter vegn la facultad netta validada cun l'exauriziun fiscala mesauna da tut ils 26 chantuns. Quai sfalsifitgescha la situaziun efectiva per il Grischun. Ils motivs per il ferm augment da bundant 120 % tar las taglias sin la facultad èn descrits qua survart. La facultad netta imponibla è s'augmentada per 154 %. L'onn 2010 èn las tariffas da taglia vegnidadas reducidas cleramain. Correspudentamain èn ils retgavs d'augmentads pli pitschens.

*Tar la dumonda 3:* La basa e la raschun principala da las reducziuns da taglia èn las libertads d'agir da la politica da finanzas pervia dal bun svilup dal retgav. A media ed a lunga vista n'han las reducziuns da taglia en general betg chaschunà perditas dal retgav. Ellas han bain contribuì ad in svilup persistent ed er ad ina cumpensaziun da l'uschenumnada progressiun reala.

*Tar la dumonda 4:* Cumpareglià cun ils auters chantuns è il Grischun tar l'imposiziun da las personas natiralas sin ina posiziun entaifer l'emprima mesadad. Cun la realisaziun da l'incumbensa Hohl concernent distgargias fiscalas per famiglias e per personas spezialisadas vegnan las pussaivladads d'agir tratgas a niz, cun la finamira da rinforzar il Grischun sco piazza economica e sco lieu d'abitar ed a medem temp da continuar cun la politica da finanzas e da taglia vertenta e stabila a lunga vista.



En num da la Regenza

Il president:

Marcus Caduff

Il chancelier:

Daniel Spadin